

## SUCHI KAŽ ŽERDKA

čo. 21

- a) maš suchu šiju, sy lačny
- b) wot slónca wusušene drasty
- c) jara ćeńki, šwižny, kosćaty čłowjek

Prawa je wotmołwa c.

*Jeli je něchtó jara ćeńki abo šwižny, prajimy wo nim, zo je suchi kaž žerdka. Mamy tež dalše serbske přirunowanja. Mi so tež suche rjebło lubi, jeli je něchtó tajki šwižny, zo su rjebła widžeć. Suche rjeblesko abo jenož rjeblesko praji so džěcom, hdyž su jara šwižne.*

### Takle móžeš to tež prajić

ćeńki, šwižny, kosćaty  
jenož kósc a koža być (tak ćeńki być, zo su kosće widžeć)  
suche rjebło (*neg.*: tak šwižny, zo su rjebła widžeć)

### Přikłady z rěčneho korpusa

Njewidzach ani toho ani toho, a tón, kotryž nětkole wustupi, *suchi kaž žerdka*, dwanaty abo tež pjatnaty semester jura, lědy hišće włosy na hłowje, radžeše nam, bibliju MOCY studować, dyrbimy wuknyć, so z jich brónjemi wobarać. (Jurij Brězan, Krabat, Budyšin 1976)

Muž je wysoki a *suchi kaž žerdka*. Přesahuje mje wo dvě hłowje. (Jurij Koch, Wšitko štož ja widžu, 2. nakład Budyšin 1992)

Tón pachol, dołhi a *suchi kaž žerdka*, měješe kołowokoło hłowje pralės z włosow, brody a wusow. (Jurij Brězan, Rokotowy kerk. Powědky a přilopki, Budyšin 2002)